



Trond Kristian Refve
Nordsjøvegen 502
4352 Kleppe

Kontakt saksbehandlar

John Inge Johnsen, 51 56 89 09

Jærstrendene landskapsvernområde med biotopfredingar. Avgrensa dispensasjon til uttak av grusmassar på gnr. 41/1, Revesanden, Klepp kommune

Uttaket av avgrensa mengde grus- og sandmassar på sjølve strandflata i det aktuelle området vil ha avgrensa verknad på landskapet sin art og karakter, og i høve fuglelivet, jf. naturmangfaldlova §§ 8-12, jf. § 7. Statsforvaltaren i Rogaland gir med dette løyve frå § 3A-1, jf. § 5-5 i verneforskrifta til eingongsuttak av maksimalt 25 m³ sjøgrus/mindre stein/sand frå Revestranden, på gnr. 41/1, herunder også motorisert ferdsle på godkjende trasear. Det er knytt følgjande vilkår til dispensasjonen:

- Volumet er avgrensa til 25 m³ grus, som eingongsuttak gjeldande til ut 2026. Uttaket kan gjennomførast når dette er høveleg for søkar, men ikkje under fugletrekket i månadene (august-oktober og mars-april) av omsyn til fugletrekket.
- Uttaket må skje lengst mogleg nede på vegetasjonslaus strandflate.
- Statsforvaltaren skal ha tilbakemelding på e-post ved oppstart av uttak.
- Massane skal heilt og fullt transporterast ut av verneområdet samstundes med uttaket.

Klagerett

Dette vedtaket kan ankast til Miljødirektoratet. Ei eventuell klage skal stilast til Direktoratet, men sendast om Statsforvaltaren for uttale. Klagefristen er 3 veker frå De mottek dette brevet.

Søknad

Vi viser til telefonsamtale av 26.05.2021, der det munnleg vart søkt om dispensasjon til uttak av grusmassar frå stranda på gnr. 41/1, i fugle- og plantefreda landskapsvernområde sør for Skarstein på Reve. Massane skal nyttast på eigen gard. Motorisert tilkomst til strandflate skal skje på etablert traktortrasé.

Heimelsgrunnlag

Jærstrendene landskapsvernområde med biotopvernområder og naturminne blei verna på nytt etter naturvernlova ved Kronprinsregentens resolusjon av 12.12.2003. Verneforskrifta blei revidert ved vedtak av Direktoratet for naturforvaltning den 30.06.2007.



Føremålet med landskapsvernet er å ta vare på det eigenarta natur- og kulturlandskapet på Jærstrendene, med sine særmerkte strandtypar og dei geologiske, botaniske, zoologiske og kulturhistoriske element som medverkar til å gje området eit særpreg.

I følgje vernereglane § 3A-1 er alle inngrep og tiltak som vesentleg kan endre eller innverke på landskapet sin art eller karakter forbode, mellom anna uttak eller utfylling av masse. Vidare i følgje § 3A-9 er motorferdsel på land forbode. I følgje § 3B-1 framgår det at "fuglane... er freda mot alle former for skade, øydelegging og unødig forstyrring". I følgje § 3C-1 er strandvegetasjonen freda mot øydelegging eller skade av einkvar art.

I følgje § 5-5 kan forvaltingsstyresmakta etter søknad og på vilkår gje løyve til mindre uttak av tang, tare, sand, grus og stein i fjørebeltet til eige gardsbehov. Dette omfattar også motorisert transport på transporttrasear utpeika i forvaltingsplan.

I Miljøverndepartementets framlegg til kronprinsregentens resolusjon i des. 2003 (revidert vern) gis det føringar om at dispensasjonshandsaming i masse-uttaksaker som dette skal ha forenkla sakshandsaming, med konkrete føringar i forvaltningsplan for uttak. I erstatnings-skjønn 2007, der den aktuelle eigedommen var inkludert, gjorde Fylkesmannen det klart at det einskilde bruk etter søknad og dispensasjon kunne ta ut 5 m³ masse i året. For grus, som berre periodevis er tilstade på stranda, kan det gis løyve til større mengde (til dømes opptil 25 m³) som eingongstiltak for fleire år.

Vurdering

I følgje § 7 i lov om forvaltning av naturens mangfald, skal prinsippa i §§ 8-12 leggest til grunn ved offentlig forvaltning:

§ 8. (kunnskapsgrunnlaget)

Omsøkte uttaksområde ligg på gnr. 41/1 sør for Skarsteinen på Revesanden. Området er landskapsverna, i tillegg til fuglefreda og plantefreda. Eit viktig bevaringsmål her er å sikre landskapspreg, alle soneringer, biotopar og dynamiske naturprosessar. Vidare sikre området sin funksjon for fuglelivet og sårbart planteliv.

Det er utarbeida forvaltingsplan for Jærstrendene landskapsvernområde og kunnskapsgrunnlaget med tanke på verneverdiar er godt i det aktuelle området. Ut frå forvaltingsplanen vil grunneigarar normalt kunne få løyve til uttak av opptil 5 m³/år av sand eller grus frå ytre strandflate, til bruk på eigen gard. Det har vært tradisjon for mindre uttak i omsøkte område og det er elles godkjent køyretrase til stranda her, til mellom anna dette føremålet.

§ 9. (føre-var-prinsippet)

Prinsippet skal nyttast i tilfelle der det kan vere tvil om konsekvensane for miljøet og verneverdiane. Eit uttak som omsøkt ligg innanfor retningslinene som er gitt i forvaltingsplanen. Det er godkjent køyretrase til stranda, og uttaket av strandsingel skal skje i fjøresona, lengst mogleg nede på vegetasjonslaus strandflate.

§ 10. (økosystemtilnærming og samla belastning)

Vernereglane opnar for mindre uttak av masse til eige bruk. Omfanget av uttak på Jærstrendene må tilpassast dei lokale tilhøva med omsyn til balansen av strandsingel i området og landskapspreget. Førekkomsten av strandsingel i strandsona er ofte av kort varigheit, før sjøen fjernar dei, eller overlagnar med sand. Fylkesmannen legg og vekt på at fleire gardar med strandrettar vil kunne ønskje å ta ut grus når denne vert tilgjengeleg og at volumet for den einskilde derfor må avgrensast.



Uttak av større mengder grus og stein er vesentlege landskapsinngrep, godt synlege i uttaksperioden. Store uttak vil kunne ha negativ økologisk påverknad på danning av strandvollar, vegetasjonen langs desse, og systemet si bufferevne mot stranderosjon. Store uttak vil på sikt kunne innebere meir langvarig skade på verneverdiane. Det er derfor viktig at uttaket er avgrensa til småstein som strandsingel, og at stein større enn dette vert liggjande att i høve den naturlege strandvollen i området.

§ 11. *(kostnadene ved forringing av miljø skal bærast av tiltakshavar)*

Søklar er ansvarleg for at uttaket vert avgrensa til mindre stein som strandsingel, og at uttaket vert lokalisert til den vegetasjonslause strandsona.

§ 12. *(miljøforsvarlege teknikkar og driftsmetodar)*

Det er godkjent køyretrase til dette føremålet, og uttransport av strandsingel må skje på ei måte som ikkje fører til slitasje eller varige spor i terrenget. Massane må fraktast heil ut av verneområdet. Uttaks-gropene skal jamnast til ved slutføring.

Med helsing

Per Kristian Austbø
ass. fylkesmiljøvernsjef

John Inge Johnsen
naturvernkonsulent

Dokumentet er elektronisk godkjent

Kopi til:

Kleppe kommune Postboks 25 4358 Kleppe